

# Ƙapiya Sën Paulus Ƙevu Vu Pilemon

---

<sup>1</sup> Sa Paulus, sa nado ƙarabus raƙ sën sa nanër Kerisi Yesu yi ƙaƙek ranƙah. Alu hil arid Timoti ƙevu ƙapiya sënë yök vu hong Pilemon sën alu ahëmin neving hong balöö nehevong Anutu yi huk loƙ ti lo. <sup>2</sup> Alu ƙevu ƙapiya sënë vu melu he avëhnömin Apiya, gevu Arkipus sën tu Anutu yi mehö-beƙö-yi ving hil lo. Log alu ƙevu vu Yesu-yi-alam sën yam denesupin sir loƙ hong begganƙ lo pin ving. <sup>3</sup> Hil Amad Anutu luho Mehöböp Yesu Kerisi degevonƙ hir semusemu nyëmasën nöƙ vu ham beham ayomin ƙëp revuh.

## Pilemon Ahë Neving Mehöböp

<sup>4</sup> Sa kwaƙ nevo hong mesa najom raƙ in hong vu sa Anutu yoh vu buk pin nebë sahëƙ nivesa vu yi in hong. <sup>5</sup> In sa nehangö galam denenër bë ahëm neving Mehöböp Yesu, bayom neya timu vu yi rot, log ahëm neving Anutu-yi-alam pin ving. <sup>6</sup> Log sa najom raƙ bë hil medo jevuh ti, in hil nehevong ving ggëp ti. Lob sënë rëƙ gevonƙ beƙejaƙ nƙaa nivesa vesa pin sën tu hil nƙaa in Kerisi-yi-alam hil lo ni. <sup>7</sup> Arig-e, yönon! Ahëm neving Anutu-yi-alam megenelöƙ vu sir lob ayoj sepëp raƙ. Gesaga vo niwëëƙ vu sa ving besa kwaƙ vesa rot.

## Pilemon Geƙo Onesimus Nom Nabë Ari

<sup>8</sup> Log sa bë ƙetaƙ nƙaa ti vu hong. Kerisi yi mehö sa, om seyoh vu bë nanër los niwëëƙ vu hong nabë gwevonƙ nabë sënë. <sup>9</sup> Rëƙ mu su rëƙ nabë saga rë, gaƙ sëƙ nahub ƙetaƙ vu hong in alu ahëd neving hil. Yönon, sa Paulus sën sa neƙetaƙ vu hong lo! Sa atov raƙ, gesa nado loƙ ƙarabus raƙ sën sa nanër Yesu Kerisi yi ƙaƙek ranƙah lo. <sup>10</sup> Sa ƙetaƙ vu hong nabë: Gwelë sa naluƙ Onesimus nivesa. In sën sa nado ƙarabus lo, lob sehërin yi yom vu Kerisi benebë sën tu sa naluƙ. <sup>11</sup> Wirekeƙ su nevonƙ huk nivesa menelöƙ vu hong rë, gaƙ gwëbeng sënë og rëƙ gevonƙ huk nivesa bedoƙ vu hong gesa geving.

<sup>12</sup> Lob sa nehevong yi yök vu hong ggök yahin, rëƙ mu sagi vonƙ bë sa vepul sa naviƙ len ti vër behevong yök vu hong. <sup>13</sup> Yönon, sa nado

loḵ ƙarabus raḵ sèn sa nanër Bengö Nivesa ranḡah, lob sa nehevongin bē ḡulin yi bemedo geving sa in doḵ nah böm bemedo geḡin sa nivesa. <sup>14</sup>Rëḵ ma gesa su rëḵ ḡevonḡ jeggin rë, in su ḡenedo in bē ḡengogëkin rë. Gaḵ mëm nabë nḡo ḡemedo bekwam bo nabë gwevonḡ nivesa vu sa, og mëm. <sup>15</sup>Onesimus tah yi vër in hongḡ dus teka, om maḵ nḡaa saga verup in bē mëm rëḵ gweḵo yi nah gökin bemedo degwata geving hongḡ. <sup>16</sup>Om gweḵo yi nök vu hongḡ, rëḵ mu su gwelë yi nabë hur sèn tu nḡaa meris mu. Gaḵ sagaḵ maya gegwëbeng og tu arim ti, om ahëm geving yi. Yönon, sahëḡ ving yi rot, rëḵ mu mëm maḵ ahëm geving yi kesuu sa, in nḡo hongḡ hur rëḵ mëm tu arim ving. <sup>17</sup>Genelë sa nebë alu nehebë loḵ ti in Yesu yi huk, om gwelë Onesimus nabë sa, megweḵo yi nök vu hongḡ. <sup>18</sup>Lob nabë vonḡ nḡaa ti paya vu hongḡ, ma su vo loḵ hongḡ nḡaa ti wirek rë, og ggovek, getum gwebë sarëḡ doḵ nah in sebo doḵ. <sup>19</sup>Senḡo ƙevu ḡaḡek sënë raḵ nemaḡ niröp bē, sa Paulus senḡo rëḵ bo doḵ nah nḡaa sënë nyëvewen vu hongḡ. (Log sa su rëḵ nanër vu hongḡ nabë sa nyëvewen ti neggëp vu hongḡ in sèn sa haḵo hongḡ yom vu Anutu wirek lo rë.) <sup>20</sup>Arig-e! Mehöböp yi mehö hongḡ, om sa bē gwevonḡ nḡaa nivesa vu sa. Nabë gweḵo Onesimus nök vu hongḡ los ahëm nivesa vu yi, og saga rëḵ gevonḡ besa kwaḡ vesa jaḵ gesa ḡevonḡ Kerisi yi huk los ayoḡ sepëp. <sup>21</sup>Log seraḵ ni besa kwaḡ nevo bē rëḵ gwevonḡ noh vu ḡaḡek sèn sa ƙevu agi. Yönon, seraḵ ni ggovek ya bē rëḵ gwevonḡ pangsen rot mekesuu nḡaa sèn senër vu hongḡ gwëbeng agi. <sup>22</sup>Log sa ḡaḡek ngwë nahën nebë: Gwero sa nyëḡ ayo ti begëp borot, in sa kwaḡ nevo bē Anutu rëḵ genḡo ham jomraḵsën, lob rëḵ bo sa vër besenök vu ham.

### Ḡaḡek Ahë-nivesa-yi

<sup>23</sup>Log Epapras sënë nedo ƙarabus ving sa raḵ sèn nenër Kerisi Yesu yi ḡaḡek ranḡah lo. Kwa nevo hongḡ ving benër bē ahë nivesa in hongḡ. <sup>24</sup>Log sir sèn he nehevongḡ Anutu yi huk loḵ ti lo, Markus, gAristarkus, geDemas, geLukas lo, kwaj nevo hongḡ ving bedenënër. <sup>25</sup>Hil Mehöböp Yesu Kerisi yi semusemu medo geving ham pin anomin.